

QVOD SS. INDIVIDVA BENE VERTAT TRIAS.
DISPVATIO INAVGVRALIS IVRIDICA,
DE

CASV FORTVITO
A DEPOSITARIO PRAE-
STANDO, OCCASIONE IV-
RIS STATVTarii HAM-
BVRGENSIS,

Part. II. Tit. III. Art. IV.

QVAM

AMPLISSIMO IVRISCONSVLTORVM ORDI-
NE ANNVENTE, IN ILLVSTRI AD VAR-

NVM ACADEMIA,

P R A E S I D E

MATTHIA BENONI HERING,

I. V. D. ET PROF. COD. DVICAL. PVBL. ET FA-
CVLTATIS IVRIDICAE H. T. DECANO,

DOMINO PATRONO, STVDIORVMQVE
PROMOTORE AETATEM COLENDO,

PRO LICENTIA

SVM MOS IN VTROQVE IVRE HONORES

RITE CONSEQVENDI,

D. XXX. OCTOBRIS ANNO MDCCXXXVI.


H. L. Q. C.

PVBLICO ERVDITORVM EXAMINI SVBMITTIT,

MATTHAEVS ALBERTVS BLOCK,
HAMBVRGENSIS.

R O S T O C H I I;

Typis IOH. IAC ADLERI, SEREN. PRINC. & ACAD. Typogr.



INCLVTAE, AC, SACRI, ROMANI
IMPERII, LIBERAE, REIPVBLICAE, HAM
BVRGENSIS, SENATVI, SPLEN
DIDISSIMO

*ILLVSTRIBVS. MAGNIFICIS. EXCELLEN
TISSIMIS, CONSVETISSIMIS, AMPLISSIMIS
ATQVE, PRVDENTISSIMIS*

CONSVLIBVS
SYNDICIS
SENATORIBVS
PROTONOTARIO
SECRETARIIS. &
ARCHIVARIO

VIRIS

HINC, FAMAE, INDE, HONORVM, TVM
MVNERVM, DENIQVE, MERITORVM
GLORIA, CELEBRATISSIMIS

SOLENNI. HOC
DE. CASU. FORTUITO. A. DEPO-
SITARIO. PRAESTANDO

EXERCITIUM. ACADEMICUM
QUANTUMVIS. INVITA. FORTE. MINERVA
CONSIGNATUM

AD. ILLUSTRANDAM. TAMEN
ET

SALTEM. UT. COMMENTARIOLI
CUIUSDAM. SPECIMEN. EXHIBERE
POSSET

PATRII. IVRIS. PARTICULAM
COMPARATUM

CUM. VOTO
FELICITATIS. PERPETVAE
ET. UT

SALUTI. CUM. PRAECIPUE. PU-
BLICAE. TUM. ET. SIGILLATIM. SVAE. SVO-
RUMQUE. QUAM. DIVITISSE. SINT
SUPERSTITES

EX. VETERI. NON. TAM. CONSVETUDINE
QUAM

DEVINCTISSIMI. SUBMISSISSIMIQUE. ANIME. LEGE
AC. FIDE. DEVOTUM
SACRATUMQUE. ESSE. CUPIT

MATTHÆVS. ALBERTVS. BLOCK
HAMBURGENSIS

CAPVT I.
DE
CASIBVS FORTVITIS.
SVMMARIA.

- | | |
|---|---|
| <p>I. Sistit ingressum.</p> <p>II. Respectu DEI non dantur casus fortuiti.</p> <p>III. Quomodo ergo ille auctor omnium casuum fortuitorum dicendus?</p> <p>IV. Sensus vocabuli casus inuestigat.</p> <p>V. Descriptionem casus fortuiti exhibet.</p> <p>VI. Distinctionem inter casum fortuitum & improvisum explicat.</p> <p>VII. An Casus fortuitus a fortuna differat?</p> <p>VIII. De diuisionibus casuum fortuitorum differit,</p> | <p>& exempla respectu DEI proponit.</p> <p>IX. Exempla respectu hominis.</p> <p>X. Inquirat: an omnis sententia in causa aliqua lata, inter casus fortuitos referenda?</p> <p>XI. Negatiuam defendit.</p> <p>XII. Nostram mentem, & distinctiones circa hanc quaestionem obseruandas, exponit.</p> <p>XIII. Viam sternit ad Caput II.</p> |
|---|---|



IESV IVVA!

CAPVT I.

DE CASIBVS FORTVITIS.

§. I.



Niuerſi huius machinam, c-
rectiori contemplantes animo,
ac eius opificem maximum at-
que excelsum, conuenienti de-
bitoque ſcrutinio admirantes, ſi
obſtupescant, & Attoniti haere-
ant, quis eſt? qui hoc iis vitio
fit verſurus. Obruunt enim
mentem omnino tam varia, quibus inueſtigandis hu-
mana imbecillitas par non reperitur, & tamen per
providentiam diuinam, non ſolum res humanas, ter-
rasque ac maria inuiolabili lege regi, atque infatiga-
bili cura conſeruari, ſed & ſingulis hominibus ſuam
ſortem

fortem, ac viuendi rationem esse statutam, quin imo nihil mortalibus accidere posse, quod non antea fues-
it, aeternis sui praepotentis creatoris decretis, tam
certum, quam quod certissimum. Delira quidem gen-
tilitas, id omne fati nomine complexa est. Ideo VIR-
GIL. *Eccl. 4.* scribit :

*Talia saecula suis dixerunt currite fufis
Concordes stabili fatorum numine Parcae.*

Et SENECA :

*Regitur fatis mortale genus,
Nec sibi quisquam spondere potest
Firmum & stabile : perque casus
Voluitur varios semper nobis
Metuenda dies.*

Aff triste hominibus solatium, quos eadem inelu-
stabilis fati vis domaret. Nos meliora & certiora e
Sacra Scriptura edocti sumus, neminem sana ratio-
ne vtentem, tam vecordem reperiri, qui, ubi vel in
coelum suspexerit, vel quæ tota hac in rerum sunt
vniuersitate perpenderit, vel etiam se ipsum confide-
rauerit, casu omnia constare, & fato quodam regi,
diuinamque prouidentiam rerum humanarum gu-
bernatricem non esse, statuet.

§. II.

Extra omnem itaque dubitationis aleam positum
est, nos, vbi de casibus fortuitis à depositario prae-
standis acturi sumus, non ea esse opinione, ac si quo-
que respectu Summi Numinis casus fortuiti daren-
tur, quin potius certi sumus persuasi, imo immota
fide credimus, nihil in hoc mundo existere, nullam
vicissi-

vicissitudinem rerum apparere, & nullum casum homini contingere posse, qui non à DEO Omnipotenti, cuius nutu cuncta geruntur, originem traheret. Iniurii ergo in almam Praepotentis Iehouae exissent, necesse est, qui mole casus alicuius inopini, vel afflictionis icti sunt, quasi fulmine fati, statim animo anguntur, & fortunae iniquitati attribuunt omnes vitiorum labes, negligentiae nostrae, vel imperitiae culpa confarcinatas.

§. III.

Interim ne & nos iniquis censoribus ansam praebeamus, peruerse concludendi, quasi DEum T. O. M. indistincte omnium casuum fortuitorum, qui in iure nostro recensentur, & illis annumerantur, faceremus autorem, opus erit omnino, ut statim ab initio, hac obiectione nos liberaturi, distinctionem quandam praemittamus, scilicet: vtrum DEus ipse casum fortuitum producat, an ab homine fieri permittat? sin prius, euentus iste semper ab omni iniustitia vacat; sin posterius, haud raro iniquitate laborat; deinde prior casus respectu omnium hominum in mundo existentium, siue qui illum patiuntur siue non, fortuitus & inopinus dicendus; posterior autem tantum manet fortuitus intuitu illorum, qui istum experiuntur, non autem qui illum studio excitarunt, & sic denique DEus autor quidem casuum fortuitorum abs se productorum, sine limitatione euadit, non autem semper eorum, quos ab homine fieri permittit, alias enim facta latronum, quae etiam inter casus fortuitos referuntur, DEum autorem haberent, licet hi ratione ipsius, pariter ac ii, quorum autor existit, pro

pro fortuitis non sint habendi, uti ex §. 1. & 2. apparet.

§. IV.

Antequam vero naturam casus fortuiti vltcrius explicemus, vocabulum casus, breuissimis ex more disputationem conscribentium recepto, ab aequiuocatione liberum sistere, dum alias varios significatus in iure habet, operae pretium remur. Nam sic haud infrequens à Jctis pro facti specie ipsi oblata, aut controuersia, quae circa rem aliquam nata, accipitur, & in hac significatione illo iam vsus est IULIANVS L. 10. ff. de LL. vbi: *Neque leges, neque Senatusconsulta ita scribi possunt, ut omnes casus, qui quandoque inciderint, comprehendantur.* Deinde & quemlibet euentum denotat. Sic in vtrumque casum, in vtrumque euentum substituere, dicitur in L. 4. pr. ff. de Vulg. & pupill. Substit. Et hoc sensuetiam inuenitur in TACITO Annual. XII. Cap. 14. vbi: *Quod vnum erat reliquum, rem in casum dare, praelioque experiri statuit.* Porro & pro negligentia siue culpa accipitur, uti in L. 9. ff. de incend. ruin. nauf. licet hoc improprie & rarissime fieri, recte moneat CARPZ. Iurispr. For. P. 2. Consl. 26. Def. 15. n. 2. Verum plures significatus adducere, & illis sinistram manum legentis implere, merito superfedemus. Qui autem plura de illo legere gestit, adeat BRISON, de Verb. Signif. sub voce: *Casus.*

§. V.

Dicendum igitur restat, quo sensu casum fortuitum acceptum & intellectum velimus? sed dixisse sufficiat, uti in stricta acceptione, & communi

B

vsu

vsu iuris accipitur, & describitur : *Quod sit inopinatus euentus, qui nulla humana diligentia vel prudentia ab illo, qui eum patitur, praecaueri potest.* L. 2. §. 7. ff. de administr. rer. ad Ciuit. pertin. L. 6. C. de Pignorat. act. L. 4. C. de Peric. tut. LAVTERB. colleg. Pract. Lib. 13. tit. 6. §. 43. HARPRECHT. ad §. 2. l. de Obligat. n. 86. Haec descriptio adeo clara nobis videtur, vt vltiori explicatione plane non indigeat, dum & omnibus Synonymis recte applicatur, quando nempe casus fortuitus in iure nostro etiam appellatur : Vis maior, L. 9. §. 2. & L. 25. §. 6. ff. Locati conduct. L. 25. §. 6. ff. de pignorat. act. fatum, L. 11. §. 5. de Minor. fatale damnum & vis magna, L. 2. in fine ff. de Peric. & commod. rei vend. vis tempestatis calamitosa, vis cui resisti nequit, L. 15. §. 2. ff. de Pignorat. act. vt plures denominationes taceamus. Nam ex his recensitis sat apricatur, verum crinomenon, & principale fundamentum casus fortuiti in eo consistere, quod nullum humanum consilium istiusmodi inopinatum euentum auertere potuerit, & quod iste quoque cuius patrifamilias, licet diligentissimo, contingere potuisset, d. l. 11. §. 5. de Minor.

§. VI.

Solent etiam Dd. casum fortuitum distinguere à casu improuiso, asserendo; quod casus improuisus imprudentibus euenire soleat, vel vt PETR. GREG. THOLOSAN. Syntogm. iur. Lib. 21. c. 12. n. 3. loquitur : *Quia casui improuiso aliquando prouideri potest, & ob negligentiam inibi culpa reprobenditur, obque culpam damnatio fit, at in casu fortuito nequaquam.* Sed hanc

hanc differentiam commentitiam vocat LAVTERB.
c. l. §. 44. Quod elogium ista quoque meretur, mo-
do explicatio recte instituatur. Nam si quis in con-
ficiendis suis negotiis, omnem circumspectionem;
qua alias homines prudentissimi utuntur, adhibuit,
& tamen res praeter opinionem cecidit, tunc even-
tus omnino improvisus emergit; ast vnum idemque
est, siue eum improuisum siue fortuitum dixeris, quia
casus existit, qui nec diligentia, nec prudentia prae-
caueri potuit. Et hinc etiam nonnunquam casus for-
tuitus & improuisus promiscue sumuntur, *L. 52. §. 3.*
ff. pro Soc. L. 13. C. Mand. Ast si per casum improvi-
sum talis intelligatur, cui prouideri potuit, & in
quo ob negligentiam culpa deprehenditur, tunc non
potest dici improuisus, hominis enim sapientis non
est, dicere: non putaram, conf. *L. 30. §. 3. ff. ad L. Aquil.*
sed abit in culposum, & sic prorsus differt à casu for-
tuito, vid. *LVDOVICI Usus pract. Distinct. Iurid. Lib. 13.*
Tit. 6. non. Distinct.

§. VII.

Porro casum fortuitum quoque à fortuna distin-
guunt, & quidem propter intentionem, quae in for-
tuna deprehenditur, dum quis subito inuenit, quod
quaesivit; casus autem solummodo ab euentu pen-
det, de quo non cogitauit. Et certe intuitu cogita-
tionum, hoc modo differentiam intercedere, non pot-
est negari; verum ratione effectus, vix discrimen
quoddam reperitur. Ponamus casum: hac intentio-
ne aliquem exspatiari, vt thesaurum inuenire velit,
in quam etiam bonis auibus incidit, & sic voti cōm-

pos redditur, nonne idem est, si etiam sine hac intentione inter ambulandum, per casum fortuitum, de quo nec cogitavit, nec cogitare potuit, thesaurum inuenisset? Nam licet appellatio casus fortuiti vt plurimum aduersis, infelicibus, & damnosis euentibus tribuatur: interdum tamen, quanquam rarius, etiam de secundis & prosperis in iure usurpatur, vti liquet ex *L. 63. §. 1. ff. de A. R. D.* vbi thesaurus donum fortunae appellatur, add §. 40. *L. de A. R. D.*

§. VIII.

Considerata itaque natura casus fortuiti, ordo nos iuber progredi ad diuisionem, quae desumenda ab autore, & quam §. 3. iam inuimus, nempe: casus fortuiti vel à DEO proueniunt, vel ab hominibus; si à DEO, tunc iterum dupliciter considerari possunt, quatenus fiunt vel praeter naturali, vel naturali modo. Per praeter naturalem modum intelligimus eos casus fortuitos, in quibus nulla causa naturalis allegari potest; per naturalem autem quando causa naturalis adest, qua DEus vsus est in casu fortuito producendo, aut quando tantum permisit; vt ex ea casus fortuitus existeret. Ad priores pertinent exempla, quae in Sacro Codice reperiuntur, v. gr. quod Sodomā & Gomorra igne quasi per pluuiam demisso in cineres redactae *Gen. XIX. v. 24.* quod ignis a Domino accensus deuorauerit extremam partem castrorum filiorum Israel murmurantium *Num. XI. v. 1.* Et si credendum PLININIO, quem allegauit PETR. GREGOR. THOLOSAN. *Lib. 36. c. 19. n. 4.* vbi & plura exempla tam sacra quam profana inuenies: quod in medio

medio mari Hieram insulam Æoliam iuxta Italiam cum ipso mari arserit. In quibus exemplis inprimis *Θεῶν βία*, cuius mentio fit in *L. 25. § 6. ff. locati*, se exerit. Ad posteriores possunt referri exempla, quae passim in legibus annotata, ut tempestas terrena & maritima *L. 2. § 6. ff. si quis caut. in iud. terrae motus L. 15. § 2. ff. Locati*, nix immoderata, *L. 78. § 3. ff. de contr. emt.* aquarum inundatio *§ 3. l. de emt. vend.* cuius hoc anno multa tristia exempla in statis litteris habuimus. Pertinet huc quoque si ex collisione in sylvis arbores incenduntur, de qua *LVCRETIVS Lib. 1. de Rer. natur.* scribit:

At saepe in magnis fit montibus, inquit, et altis arboribus vicina cacumina summa terantur inter se, validis facere id cogentibus Austris, donec fulserunt flammæ fulgore coorto.

§. IX.

Quod attinet ad casus fortuitos, qui ab hominibus proficiscuntur, ad illos communiter referuntur, latronum hostiumve incursus, & piratarum insidiae, *L. 18. pr. ff. Commod. tumultus, L. 23. in fin. ff. de R. I. factum principis & omne damnum datum a potentiore L. 23. in fine ff. locati*, sententia iniusta *per. L. 51. pr. ff. de iud.* & id genus alia. Vid. *SEBAST. MED de casib. fortuit Part. 1. qu. 13. n. 18.* Nam omnes casus fortuitos, qui tam a Summo Numine, quam ab hominibus producuntur, ad certas species redigere velle, possibilitati resistit, cum dari possint innumerae *PETR. GREG. THOLOS. d. 12. cap. 12. n. 3.* Quare hic multa de distinctione inter casum solitum & insolitum

congerere noluimus, approbantes illorum opinionem, qui hoc prudentis arbitrio iudicis committunt, conf. **MENOCH**, de Arbitr. Iud. Quæst. Lib. 2. Cent. 1. Cas. 80. n. 8.

§. X.

Et hæc possent sufficere de casibus fortuitis; antequam tamen finem huic capiti imponamus, vnam quaestionem enodare lubet, scil. an omnis sententia in causa, inter casus fortuitos sit referenda? & quidem secundum vulgatum: *Eine Urthel ist, als wenn man sie aus dem Glücks-Topff gegriffen.* De iniusta sententia, nempe quod illa casui fortuito sit annumeranda. §. præced. dictum. Quanquam & hoc assertum non sine limitatione dimittant DD. distinguendo: an iudex in decidenda causa ordinem processus & iuris plane insuper habuerit, & leuato velo aliquem suo iure priuauerit: an vero per errorem iuris vel facti, non tamen neglecto iuris ordine, iniquam tulerit sententiam? ita vt priori modo iniusta sententia pro fortuita habenda; non autem posteriori **STRYCK V. M. Tit. de Euic. §. 13.** Et fatendum habemus omnino, non leuia dari argumenta, quibus euinci posse videtur, quamlibet sententiam sibi locum vindicare inter casus fortuitos. Quid enim notius est? aut quid per experientiam omnium rerum magistratam magis probatur? quam quod nemo, etiam in optima causa, sibi certo promittere possit victoriam, cum litis euentus semper sit dubius. *L. 51. ff. de Pecul. l. 15. ff. vt Legat. vel fideic. nom. cau.* Si causam quaeras? est in promptu. Potest hoc fieri, vel per imprudentiam, vel per dolum iudicis, *L. 15. §. 1. ff. de Iudic. L. 5. §. 4. ff. de O.*
E A.

§ A. imo L. II. ff. de lust. § Iur. asseritur : Praetorem ius reddere, etiam quando inique decernit, & tunc subiusto clypeo quoque pereundum. Hinc CARP. ZOV. P. I. const. 26. Def. 21. n. 1. scribit : *Verissime dixit, quisquis dixit, sententiam iudicis atque litis victoriam inter casus fortuitos referri.* HEIG. P. I. qu. II. n. 2. GASTEL in Spec. Iur. vniu. cap. 30. n. 2.

§. XI.

Verum de qualibet sententia hoc affirmare, non audemus, cum sic omnino sequeretur, omnes nostras actiones, omniaque nostra negotia casibus fortuitis esse annumeranda, quia in omnibus insperatus aliquando euentus accidere, & res, licet certo innitatur fundamento, praeter opinionem cadere potest. Ac inprimis albus illorum sententiae adiiciendus esset calculus, statuentium, litigatorem ludentibus esse aequiparandum, vbi vterque spem lucri faciendi habet. Ex quo Rabalaeus putat, non controuertendum, sed de litibus ludendum esse tesseris, quia propter negligentiam iudicis, aduocati vel etiam partium causa amitti potest, quod intolerabilius est, quam si per tesseras ius laederetur, quia hic nulli sumtus impendendi, inimicitiae nullae tolerandae, non negligenda negotia magis necessaria, aduocatis & scribis se nemo tenetur subiicere, nec dies noctesque anxietatibus conterendae HUNSDOENER in grossen Schau-Platz P. I. c. 33. n. 10. quem allegauit celeberrimus SAM. FRIED. WILLENBERG in Disp. de Litium incommodis. cap. 2. §. 7.

§. XII.

Distinctionibus ergo, quantum nobis cernere datur,

datur, haec quaestio est enucleanda, quae vel iudicem, a quo sententia ferenda; vel causam, quae decidenda, respiciunt. Quod attinet ad iudicem, ille vel iudicio pollet, atque solida iuris scientia, quae ad causarum controuersarum decisionem necessaria, tinctus; vel his quoque remediis destitutus est: si prius, quod regulariter praesumendum, cum iniustitia & imperitia delicti species sit *pr. Inst. de Obligat. quae quasi ex delict.* nulla sententia pro fortuita est habenda: Sin posterius tunc considerandum, an sententia fuerit iusta, an iniusta? Si iusta inter casus fortuitos est referenda, quia tunc in illum quadrat, quod in communi proverbio dicere solemus: *Ein blind Huhn findet zuweilen auch ein Korn*: si iniusta, tunc inter casus fortuitos illam non esse referendam credimus, dum à tali imperito iudice nihil aliud expectari potuit, quod quisque Helleboro non purgandus facile praeuidere potuisset. Deinde distinctio, quae ex ipsa causa controuersa fluit, non est negligenda, scilicet: utrum illa inter problemata referenda, quae in vtramque partem praegnantibus rationibus defendi possunt; an ea ita comparata, ut expressam decisionem in legibus iam habeat, nam ista distinctione obseruata, in proclini est, quod in casu dubio, ubi lecti magni nominis in diuersas abeunt partes, sententia pro fortuita sit habenda; non vero in eo, quem leges sine controuersia clare dicunt.

§. XIII.

Plures quaestiones circa materiam casuum fortuitarum facili negotio adducere potuissemus; verum

rum quia instituti ratio hoc non permittit, dum ea non naturam tantum casus fortuiti inuestigare iubet, verum etiam considerationem, quando ille praestandus? efflagitat; hinc in sequenti capite hanc materiam sub incudem reuocaturi, & simul nobis viam ad thema propositum excutiendum, praeparaturi sumus.

CAPVT II.

DE

PRAESTATIONE CASVS FORTVITI IN GENERE.

S Y M M A R I A.

- | | |
|--|---|
| <p><i>I. Quomodo vocabulum praestationis in iure accipiat?</i></p> <p><i>II. Generalem regulam de praestandis casibus fortuitis proponit.</i></p> <p><i>III. Quatuor limitationes huius regulae indicat.</i></p> <p><i>IV. De prima limitatione, ubi culpa casum praecessit, agit.</i></p> <p><i>V. Ab hac culpa non liberatur licet praeter intentionem casus acciderit.</i></p> <p><i>VI. Limitationem secundam & tertiam breuibus innuit.</i></p> | <p><i>VII. Limitationem ultimam sistit, & eius iustitiam defendit.</i></p> <p><i>VIII. An qui periculum in se suscepit, etiam de casu teneatur?</i></p> <p><i>IX. Quaestionem continet: An princeps viatoribus damnum per casum fortuitum illatum, resarcire debeat?</i></p> <p><i>X. Huius quaestionis decisionem habet.</i></p> <p><i>XI. Pauca de casu fortuito in contractibus praestando affert, & progressum ad Cap. ult. insinuat.</i></p> |
|--|---|

C

CAPVT

CAPVT II.

DE PRAESTATIONE CASVS FORTVITI IN GENERE.

§. I.

LArga hic primum colligere manu exempla, in quibus vocabulum praestationis in eodem accipitur sensu, quo à nobis acceptum, vix operae pretium remur. Interim ne morem consuetum migrare videamur, aut lectorem vel ex minima parte in suspenso relinquamus, statim ab initio huius capituli, per descriptionem quandam vocabuli praestationis, sensum planum sistere, & exemplis ex iure depromtis, probare volumus. Intelligimus itaque per praestationem casus fortuiti nihil aliud quam reparationem damni, quod alicui ex inopinato, & praeter suam culpam existente facto, obtingit. Et hoc in significato vocabulum praestationis in iure adhibitum fuisse, passim inuenitur. Sic legitur in *L. 1. §. 15. ff. de vi & vi armata. Si Dominus seruorum suorum factum praestaret. L. 149. ff. de R. l. Ex qua persona quis lucrum capit, eius factum praestare debet. add. L. 23. Eod. L. 5. §. 2. ff. Commod. L. 21. ff. pro Socio.*

§. II.

Antequam autem pedem ulterius promoueamus, nobis de praestatione casus fortuiti in genere acturis,

ris, è re esse videtur, regulam istam generalem praemittere, scil. neminem regulariter ad praestandos casus fortuitos teneri. Ratio huius asserti in ipsa aequitate naturali fundata, quae non patitur aliquem damnum incurrere, ob factum, quod diligentissimo patrifamilias accidere, imo cui auertendo humanae vires pares haud fuerunt, quod affirmat PVFFENDORFF. *de I. N. & G. Lib. 3. cap. 1. §. 6. ex casu fortuito ad reparationem damni neminem teneri manifestum est, ubi scil. nulla alicuius culpa admixta est.* Licet ad humanitatis officia pertineat, pauperem aliquo modo indemnem praestari, si à locuplete per casum fortuitum ei damnum illatum, quia liberalitati ipsius congruens est, miserum aliquo beneficio solari, vti loquitur PVFFEND. l. c. Deinde regula illa generalis: casum fortuitum à nemine esse praestandum, approbata quoque reperitur tam in iure civili, quam canonico, vti liquet *ex L. 23. ff. de R. I. L. 9. C. de Pignorat. act. c. Nemo. 6. de R. I. in 6.* Et sic per se fluit, Dominum rei damnum fatale ferre debere; quamvis ista alterius curae fuerit commissa, cum ad impossibilia nemo obligetur, & pro quibus omnino habenda, quae nullo humano consilio praecaveri possunt. Vid. *L. 35. pr. & L. 69. ff. de V. O.* Porro considerandum, quod, sicuti casuale incrementum ad dominum spectat, ita nihil magis aequitati congruat, quam ab illo fortuita quoque damna aequo animo esse ferenda, quorum collineant verba in *L. 2. §. 6. ff. de Aqu. & aqu. plu. arc. aequo animo unumquemque ferre debere, siue melior siue deterior eius conditio facta sit.*

§. III.

Enim vero hanc regulam generalem, limitationes quasdam pati, omnes inter constat, quare nostrum erit, eas plane breuissimis tangere, ac quasi per indicem tractare, quia, vti iam in §. vlt. Cap. praeced. indicauimus, nobis animus duntaxat est, per hanc considerationem viam sternere ad caput propositum excutiendum. Solent autem vulgo quatuor allegari causae, ob quas quis à praestatione casus fortuiti se liberare non potest, nempe: 1. Si culpa casum praecesserit, 2. Si debitor in mora fuerit. 3. Si aestimatio interuenerit, & tandem 4. si quis praestationem casus pacto in se receperit.

§. IV.

Quod ad primam attinet causam, tunc quidem nemo ambigit, eum de casu fortuito teneri, qui huic per culpam suam ansam dedit L. 22. ff. de Negot. Gest. L. 5. §. 4. ff. Commod. MEVIVS Part. 11. Dec. 275. CARPZOV. Part. 2. Const. 26. def. 4. n. 12. ANTON. FABER in C. Lib. 4. Tit. 42. Def. 12. n. 19. modo ex tali culpa casus contigerit, quae in contractu praestanda erat. Sic quando contractus vtriusque contrahentis vtilitatem respicit, in quo levis culpa praestanda venit, & culpa leuissima casum praecessit, tunc nihilominus exceptione interitus fatalis se tueri potest, quia natura contractus huius culpa praestationem non desiderat; hinc in diiudicanda praestatione casus fortuiti, ad indolem negotii semper respiciendum est. Interim licet haec adducta, ratione effectus recte

recte sese habeant, quod ille, de casu non teneatur; atamen rem curatori animo considerans, statim animaduertet, illum non ideò a praestatione liberum esse, quia est casus fortuitus; sed quia ad istam diligentiam & circumspectionem non erat adstrictus. Nam quicumque casus, aut quodcunque factum culpam praecedentem agnoscit, illud pro fortuito non est habendum, secundum canonem: cui non competit definitio, illi nec definitum, cum casus fortuitus praecaveri non possit. Vid. BERGER, *Oeconom. Jur. Lib. 3. Tit. 8. Nov. 1. LVDOVICI Doctr. Pand. Tit. Commod. §. 25.*

§. V.

Ex his dictis porro quoque fluit, aliquem non esse absolendum à praestatione casus, si dicat: illum contra suam intentionem accidisse, quia sufficit culpam praecessisse. Exemplum esto. Si quis ioci ergo mihi nummos de manu excusserit, & illi ita perierint, puta si in flumen vel in mare, vel incloacam ceciderunt, de quo casu mentionem iniicit L. 27. §. 21. ff. ad L. Aquil. §. 11. I. de Obligat. quae ex delict. Licet enim hic animus non fuerit, mihi damnum inferre, nam si ille adfuisset, alia actio locum haberet, attamen exceptione casus fortuiti, contra reparationem damni, se tueri non potest. Simile exemplum in L. 50. §. 4. ff. de Furt. de illo qui pannum rubrum ostendit fugauitque pecus, non enim debet impunitus esse lusus tam perniciosus. Aliter tamen iudicandum esse putamus in hoc casu, si quis sponte rem aliquam fluctibus exponit, inita sponsione, de iis per

agilitatem mox recuperandis, quae tamen fluctibus abripitur. Nam hic vterque contrahentium in abiectionem consentit, alter ut suam agilitatem in extrahendis rebus probaret partim, partim ut & lucrum sibi quaereret; alter ut tantum lucrum ex spon- sione caperet. Ergo quia dominus rei interitum praevidere potuit, & sibi imputandum habet, quod tam incertae arti rem suam commiserit, illius aesti- mationem praetendere nequit. Et licet alias impe- ritia in arte quam quis profitetur culpaee annume- retur; tamen haec regula hic valere non potest, dum haec ars fere inter illicitas est referenda.

§. VI.

Secunda & tertia limitatio regulae generalis, v- bius quoque obuia est. Mora enim perpetuat obli- gationem, & transfert periculum in morosum L. 23. § L. 82. ff. de V. O. c. mora 25 de R. I. in 6. MEV. P. 5. Dec. 45. nisi forsan rem retinuerit ex iusta causa. arg. L. 22. ff. de Vfur. aut ea apud alterum eodem modo fuisset peritura. L. 14. §. 1. ff. Depositi. conf: PVFFEND. De I. N. & G. Lib. 5. c. 4. §. 6. GROT. de I. B. & P. Lib. 2. cap. 12. §. 13. Quae tamen excep- tio eliditur, si alter docere possit, se rem peremptam ante interitum distrahere voluisse, & potuisse L. 47. §. fin. de Legat. 1. Interim an hoc casu inter actio- nes reales & personales, distinctio sit adhibenda? vid. BACHOV. ad Treutl. Volum. 2 Disput. 3. Thes. 8. Litt. A. & quando debitor in mora constitutus dicatur: an nempe sufficiat interpellatio extraludi- cialis, an praecise requiratur iudicialis? an tempus litis

litis contestatae, an rei iudicatae attendendum ? & multas alias quaestiones nostras non facimus, quia hae nimis longe á scopo nos abducerent. Hinc quoque de tertia limitatione nihil amplius adiicere lubet, quam rationem, ob quam debitor tunc teneatur casum fortuitum in se suscipere, & haec reperitur in L. 5. §. 3. ff. *Commod.* L. 1. in fine ff. *de aestimat.* quia per aestimationem & traditionem transfertur periculum in accipientem, si nempe aestimatio venditionis gratia facta, quod in dubio in contractu, ad dominium transferendum habili, praesumitur. Exemplum est in fundo dotali, qui aestimato in dotem datus L. 10. pr. & L. 4. ff. *de Fure dot.* & L. 10. C. *de iure dot.*

§. VII.

Tandem & pauca dicenda restant de vltima limitatione, quando quis casum in se recepit. Hanc vero receptionem fieri posse, nec iniquitate laborare, vel exinde liquet, quia rei suae liberrimus quisque moderator & arbiter est. L. 21. C. *Mand.* ergo etiam pro lubitu conuentionem inire potest, secundum L. 23. ff. *de R. I.* pacta dant legem contractui, & quod ab initio est voluntatis, ex post facto fit necessitatis L. 5. C. *de O. & A.* Siquidem id quod per conuentionem praestari debet, non minus iuris est, atque id, quod sine conuentione, ex ipsa natura contractus praestandum. L. 34. ff. *de R. I.* Nec est, quod dicas, hanc conuentionem iniquitatem sapere, quia casus fortuitus nulla cura aut diligentia euitari potest, rerum autem impossibilium nulla datur obligatio, quoni-

quoniam omnino distinguendum: an quis promiserit, se uelle omnes casus fortuitos auertere, an tantum praestationem damni ex illis contingentis; nam prius humanas vires excedit, & sic consequenter regula adducta: impossibile non dari obligationem, etiam recte applicatur: non autem posterius, dum ex bonis promittentis haec reparatio damni fieri potest, & obligatio inter impossibilia minime est referenda, vid. ANT. GOMEZ. *Var. Resolut. Lib. 2. cap. 3. n. 19.* RICHTER *Dec. 81. n. 31. seqq.*

§. VIII.

Hoc autem minime praetereundum esse censemus: An is, qui periculum rei pacto in se suscepit; quoque casum fortuitum praestare teneatur? Et certe non desunt statuentes, appellationem periculi casum fortuitum sub se non comprehendere. Ast generaliter hoc affirmari non potest, cum potius dicendum, eum regulariter casum fortuitum ferre debere, qui periculum rei, per pactum sibi imponi passus est, nec attendendum: an interitus sine, an cum culpa contigerit? quia vocabulum periculi tunc vicem generis sustinet, quod species interitus cuiusvis sub se comprehendit. Et hoc sensu acceptum reperitur in L. 1. § 14. ff. *De Pericul. & commod. rei vend.* L. 3. § 4. ff. *de Naut. Foenor.* L. 1. C. *Mand.* & passim. Quamuis nos non lateat, vocabulum periculi haud raro etiam denotare damnum culposum, & rem nostro periculo esse dici, in qua non casum fortuitum, sed tantum culpam leuem vel leuissimam praestamus. L. 1. § 35. ff. *Depos.* L. 37. §. 1 ff. *de Negot. gest.* VINN.
ad

ad §. 2. I. *Quib. mod. re. contrah. obl. n. 4.* Verum exinde nihil aliud sequitur, quam vocem periculi interpretationem ex substrata materia accipere, & sic res commodatas nostro dici esse periculo, quia in illis leuissimam, locatas autem, quia in illis leuem culpam praestamus L. 13. §. 1. ff. de *Liberal. caus. & artificem*, pacto periculum rei locatae in se suscipientem, de casu fortuito teneri. L. 13. §. 5. ff. *Locat. Cond.* quippe qui ex natura contractus iam erat ad leuissimam culpam praestandam obligatus L. 25. §. 7. ff. *Eod.* Manet itaque certum secundum regulam, periculi nomen, casus quoque fortuitos complecti, & eum, qui generaliter periculo rei se subiecit, etiam casum ferre debere, vid. *Dissert. MENCKENII de conuent. circa praestand. Cas. fortuit.* §. 19.

§. IX.

Verum dum circa praestationem periculi huc usque occupati fuimus, indagando: quid in ea iustum? haec materia nos ducit ad aliam quaestionem, merito huc trahendam, nempe: An princeps territorii sit obligatus, viatoribus damnum à praedonibus illatum refarcire? Hoc enim damnum intuitu patientium inter casus fortuitos esse referendum, iam supra Cap. 1. §. 9. asseruimus. Non quidem negandum, inter principem & viatorem, expressam conventionem haud interuenisse, ex qua ille obstrictus videtur, hunc indemnem praestare. Ast veram conventionem de casu fortuito ferendo, tam ab expresso, quam tacito consensu dependere, nemo fortean in dubium vocauerit, cum notum sit, tacitum consensum pariter at-

D

que

que expressum, verum operari contractum. Quare etiam MENCKENIVS in *allegata Disput.* §. 7. conventionem de ferendo casu fortuito distinguit, in veram & praesumptam; tacitam autem, quam verae conventioni recte annumerat, hoc exemplo illustrat, dum scribit: *Quando enim Titius Cui socius, cum generaliter id actum est, ut Caius meliore conditione in societatem admitteretur, Cui in rationibus societatis omnes casus fortuitos imputat. Et ipse computationi huic, cum posset & deberet, si ab ea conditione abhorreret, nequaquam contradicit, sed secundum eam fieri saepius lucri distributionem patitur, nemo facile negabit, casus fortuitos tacite à Titio susceptos esse.* His praemissis, ex quo fundamento princeps damnum viatoribus illatum praestare, adstringatur? nostrum nunc erit, dum affirmatiuam defendere conamur, paucis ostendere.

§. X.

Quod igitur ad fundamentum attinet, principem obligans ad damnum resarciendum, hoc ex duplici fonte deriuatur, nempe: vel ex officio ipsi, tanquam principi iam incumbenti, vel ex praestatione vestigialis. Ad officium autem omnino quoque pertinere securitatem viarum, exinde fluit, quia viae publicae hodie domini territorii vniuersalis sunt, & inter regalia referuntur. Hinc haec securitatis praestatio etiam describitur: Quod sit singularis quaedam praerogativa, & regale superiori rati territoriali regulariter cohaerens MATTH. WESENB. *Conf.* 33 n. 3. *Recess. Imp. de anno 1559 §. 28.* Imo & in iure civili hoc officium superiori incumbere, asseritur in *L. 12. pr. ff.*

pr. ff. de offic. praef. vbi : Congruit bono & graui Praefidi curare, ut pacata atque quieta prouincia sit, quam regit ; quod non difficile obtinebit, si sollicitè agat, ut malis hominibus prouincia careat, eosque conquirat. Et sic sola officii ratio iam suppeditat non leue argumentum, ex quo damnum viatoribus à praedonibus illatum, princeps territorii resarcire tenetur, quia istis nihil imputari potest, fretis prouidentia principis, vias regias fore tutas. Sed alterum fundamentum adhuc magis stringit territorii dominum, viatores indemnes praestare, scilicet vectigalis praestatio. Huius enim finis est, ut viae reparentur, & secure ire, atque redire queant cum bonis suis viatores. Quare ZIEGL. de Jur. Maies. Lib. 2. cap. 13. §. 2. in fin. scribit: Ex perceptione igitur pedagii aut vectigalis videtur percipiens ultra debitum, ex iure principis proueniens, tacite se obligare ad praestationem securitatis per territorium suum. Et hanc consuetudinem tanquam antiquam probat CUIAC. Lib. 19. Obseru. Cap. 11. Vbi CVMANVS Syriae procurator plurimorum vicorum dominis imputasse legitur, quod latrones persecuti non comprehensissent. Ex his itaque adductis, pronò fuit alueo, principem, licet expressam conventionem de damno resarciendo cum viatoribus non inierit, eum tamen ex officii ratione, & perceptione vectigalis, ad hoc esse obligatum, adhibita tamen hac distinctione: an ipsi aliquid circa hunc casum imputari possit, nec ne? Nam sicuti in aequitate naturali prius fundatum, sic & posterius. Ergo si dominus territorii à sua parte nihil intermisisset, ad vias reddendas tutas, tunc quia culpa caret omni, via-

D :

tor

tor hunc casum ferre debet, pariter quoque si à via regia deuiet. conf. AHASV. FRITSCH. *opusc. var. Tract. 3. de Regal. mund. iur. ac Priuil. cap. 6. §. 7.*

§. XI.

Nunc etiam nobis progrediendum esset ad singulos contractus, ostendendo: quid in illis circa praestationem casus fortuiti iustum sit? verum nostro themate unum duntaxat contractum continente, admodum pauca hic delibasse sufficiet, & potest is, qui pleniorē huius materiae inuestigationem desiderat, CASP. ZIEGL. *Disceptationes selectas & quidem Thema XV. de casu fortuito* euoluere, qui, quid in singulis contractibus, quid in vltimis voluntatibus, quid in iudiciis & tandem quid in delictis circa casus fortuiti praestationem obtineat? pluribus exposuit §. 12. *seqq.* Contractus itaque à nobis hic tantum diuiduntur, quatenus in illis dominium rei transfertur, vel quatenus usum aut custodiam alteri tantum rei nostrae concedimus. Sin prius, tunc ipsa aequitas naturalis suadet, alterum casum fortuitum ferre debere, quia ad genus tunc restituendum obligatur, quod perire non censetur, L. II. C. si cert. per. Exemplum est in illo, qui mutuum contraxit; nam licet pecunia mutuo accepta, antequam eam in suos usus conuertisset, casu periret, tamen ad illius restitutionem recte condemnatur. Sin autem posterius, tunc regulariter dominus interitum fatalem sustinet, vti in commodato, pignore, & deposito. Interim quia nulla regula tam firmans, quae non patiatur exceptionem, & rubrica nostrae disputationis indica, à de-

posita.

positario interdum casum fortuitum, in re deposita esse praestandum; hinc sine ulteriori circuitu ad hocce thema excutiendum, nos accingamus, necesse est.

CAPVT III.

DE

CASV FORTVITO A DEPOSITARIO PRAESTANDO.

S V M M A R I A.

- | | |
|---|---|
| <p>I. Statutum quod Tractationi ansam dedit, continet.</p> <p>II. Vocabulum depositi explicat.</p> <p>III. Descriptionem Depositii sistit.</p> <p>IV. Varias species depositi recenset.</p> <p>V. Quid a Depositario regulariter praestandum?</p> <p>VI. Quid in deposito irregulari obtineat?</p> <p>VII. De quali Deposito Statutum loquatur, & quodnam sit eius fundamentum inuestigatur.</p> <p>VIII. Iustitiam huius statuti evincit, & defendit.</p> <p>IX. Commodum ex hoc Sta-</p> | <p>tuto in Rempubl. redumdant, ostendit.</p> <p>X. Casum in Statuto comprehensum indicat, & simul quaestionem enucleat: an hoc Statutum applicationem iam inueniat, si venditionis contractus quidem celebratus, sed traditio rei nondum secuta?</p> <p>XI. Quid in contractu pignoratitio statuendum?</p> <p>XII. Quid si hypobecae nexu rem depositam tantum obligauerit?</p> <p>XIII. Quid in Commodato?</p> <p>XIV. An Necessitas alienationis depositarium excuset?</p> |
|---|---|

D 3

XV. Pro-

- XV. *Progressum ad exceptiones, quibus casum fortuitum praestare obligati videntur, facit.*
- XVI. *An hic depositarius ad exceptionem inter casum solitum, insolitum, & insolitissimum confugere possit?*
- XVII. *An exceptio: rem depositam eodem modo apud deponentem perituram fuisse, ipsi proferat?*
- XVIII. *An Deponens exceptionem: se rem voluisse & potuisse distrabere, urgere possit?*
- XIX. *Si ergo condemnandus depositarius, ad quidnam obligetur?*
- XX. *An Deponens ad iuramentum in litem sit admit- tendus?*
- XXI. *An Depositarius exceptionem compensationis opponere possit?*
- XXII. *Rationes negatiuae defendentium adducuntur.*
- XXIII. *Quid nobis sedeat opinionis perhibetur.*
- XXIV. *Ratio negantium prima diluitur.*
- XXV. *Ratio secunda & tertia quoque explicantur.*
- XXVI. *An etiam haeredes depositarii ad casum fortuitum resarciendum, teneantur? ubi distinctio an viro adhuc depositario, an postea casus contigerit?*
- XXVII. *Finem nostro labori imponit.*

CAPVT III.

DE

CASV FORTVITO A DEPOSITARIO PRAESTANDO.

§. I.

Praemittendis itaque praemissis de casu fortuito, & eius praestatione in genere, nunc thema ipsum inuestigandum venit. Quoniam autem,

autem, vti ex Rubro constat, ad hanc materiam eligendam ansam nobis dedit STATVTVM HAM-
BURGENSE, quod *Parte II. Tit. III. Art. IV.* legi-
tur, hinc illud praemisisse, non abs re credimus. Er
vero hunc in modum conceptum: *Hätte einer de-
ponirtes Guth verkauffet, und solches darnach wieder
gelöset, in Meynung es ferner als ein depositum in
getreuer verwahrung zu behalten, solchents aber dasselb,
wie wohl wieder seine Schuld, umbqueme oder verloh-
ren würde: So soll er nichts desto weniger dasselbe zu
bezahlen schuldig seyn, weil er einmahl seiner Treu und
Pflicht nicht genug gethan.* Hoc statutum ex iure
civili desumptum, aut ad minimum cum illo coinci-
dere, patet ex *L. 1. §. 25. ff. Deposit. vbi: Si rem de-
positam vendidisti, eamque postea redemisti, in causam de-
positi, etiamsi sine dolo malo postea perierit, teneri te de-
positi: quia semel dolo fecisti, cum venderes.*

§. II.

Enimvero hocce statutum à communi regu-
la: rem perire suo domino, deflectere, iam ex
Cap. 2. elucescit: Quia autem nemo de exceptione
tractationem instituere potest, nisi regulam funda-
menti loco posuerit; hinc istud confusionis vitium
evitaturis, ipsa necessitas iniungit, primum in natu-
ram depositi inquirere, & postea rationes & casus
adducere, ob quas & in quibus diuortium à com-
muni regula sit faciendum. Et sicuti etymologia
vocis non est negligenda, cum saepe ad sensum mul-
tum valeat, sic & nos brevibus illam sistere volu-
mus. Deriuat autem depositum VLPIANVS in *L. 1.*

pr. l.

*pr. ff. Depos. a de & ponendo & quidem vt ostendat totum fidei eius commissum, quod ad custodiam pertinet, quia praepositio de auget depositum, qui effectus huic praepositioni semper attribuitur, quoties cum aliquo verbo coniungitur, ac idem est quod valde, vti patet ex verbis: desrui, deperio, deamare etc. vid. GOTHOFK. ad d. L. 1. Vocatur alias quoque commendatum, seu commendatio, unde Rubrica Tit. III. Juris. Hamb. ita sonat: Von Gütern so zu treuer Hand gegeben und hinterlegt worden. Nam veteres his verbis: deponere, custodiendum dare, & commendare promiscue vsos fuisse, liquet ex L. 24. § 26. *pr. ff. Depos.* Caue tamen, putes, omne commodatum depositum esse, siquidem commendare quoque dicitur, quando quid alicui expediendum commendamus, aut quando aliquem litteris commendatis ornamus L. 2. *ff. Mand.* L. 37. *ff. de dolo malo.* Est itaque omne depositum commendatum, sed non omne commendatum depositum. Habet hocce vocabulum adhuc plures significatus, quibus tamen recensendis non immorabimur, modo adduxerimus, interdum vel denotare rem, quae apud aliquem deposita est, L. 12. §. 1. *ff. depos.* L. 10. *C. cod.* interdum vero etiam ipsum contractum, quo res deponitur, L. 7. §. 1. *ff. de Pañ.**

§. III.

Cum itaque vocabulum depositi pro ipso contractu accipiatur, nunc & descriptio illius non est omittenda. Solet autem haec plerumque hoc modo formari, quod sit: *Contractus realis seu traditio rei gratis*

gratis custodiendae, & ad libitum deponentis in eadem specie reddendae. FRANTZK. ad ff. Tit. Depoj. n. 4. HOPP. Comment. ad §. 3. Inst. quib. mod. re contrah. obl. Verum recte observavit LAVTERB. Colleg. pract. Tit. Depoj. §. 1. hanc definitionem suo definito esse restrictiorem, si nempe verba : *ad libitum deponentis & : in eadem specie*, in ea adhiberentur, quoniam haec descriptio etiam sequestum, tanquam speciem depositi, sub se comprehendat, necesse est, hoc autem ad libitum deponentis, aut quandocunque repeti haud potest, sed tamdiu expectandum, donec res finita ; deinde & in deposito irregulari, non eadem res in specie, sed tantum in genere est restituenda. Hinc his verbis definitionem concepit : *Quod sit contractus realis, quo res gratis custodienda traditur & recipitur.* Conclusiones autem ex hac definitione fluentes, scil. hunc contractum inter nominatos esse referendum, absque traditione rei sui perfectionem non accipere, nullam mercedem, licet honorarium, intercedere posse, etc. adducere merito superse-
mus, quia haec omnia ubique reperiuntur.

§. IV.

Divisiones tamen hic negligendas esse minime putamus, cum & detur depositi species, quae multum ex natura mutui admixtum habet, unde & semper casus fortuitus à depositario ferendus. Solent vero à DD. generaliter hae species recenseri, secundum quas depositum diuiditur (1) in *actuale seu verum, & confessarium seu fictum* : illud dicitur, quando de naturali translationis actu constat ; hoc vero quod duntaxat

E

ex

ex confessione depositarii apparet, quanquam ratione effectus omnino differentia intercedat. vid. MOZZIVS. in tract. De Contr. Tit. de Depos. sub. rubr. de Diuis. Depos. n. 6. sqq. (1) In depositum *Juris & facti*. Illud est quando a debitore pecunia, quam accipere creditor recusabat, apud iudicem deponitur, & ob signatur, & cursus usurarum sistitur. MEV. ad *Ius Lübec. P. 3. Tit. 3. art. 2. n. 2*. Cum autem intentio debitoris non sit depositum contrahendi, sed potius ab obligatione se liberandi; igitur hoc huius loci esse non videtur LAVTERB: *Colleg. pract. b. t. §. 6. ibique alleg.* Hoc autem quod depositum facti vocatur. (3) diuiditur in *depositum in specie sic dictum, & sequens*. Illud iterum est vel *voluntarium* vel *necessarium*, quod posterius & *miserabile* audit, dum propter imminens periculum, v. g. tumultus, incendii &c. res deponitur, hoc autem est quando res litigiosa auctoritate iudicis vbi etiam necessarium appellatur, vel a litigantibus vbi voluntarium, apud tertium deponitur, LVDOV. *Doctr. Pand. Tit. Depos. §. 5.* Tandem (4) depositum est vel *regulare* vel *irregulare*: illud dicitur, quando res deposita, ex natura huius contractus in specie restituenda; hoc autem quando res non in specie, sed in genere tantum restituenda, quare etiam depositum *anomalum, mixtum, & improprium* appellatur, quia notissimos depositi terminos egreditur, & de mutuo participat. *L. 24. ff. Depos.*

§. V.

Consideratis quoque speciebus depositi; nunc nobis pergendum est ad id, quod depositario, siue illi apud quem res deposita, ex hoc contractu praeestandum

dum incumbat. Et hic regulariter tantum dolum & latam culpam praestat, quia ex hoc contractu nihil prorsus utilitatis ad eum redundat §. 3. *J. Quib. mod. re. contrah. obl.* Quae culpa tamen ex persona depositarii aestimanda; quapropter si is in rebus suis exactissimam diligentiam adhibet, & omnes suas actiones cum maxima circumspectione gerit; tunc etiam non minorem diligentiam rebus depositis destinare debet: Contra si in rebus & actionibus suis admodum negligens deprehenditur, nec maiorem rebus depositis attribuere tenetur *L. 32. ff. depos.* TRANTZK. *ad ff. b. t. n. 79. sqq.* quoniam hoc casu deponens de se conquerendum habet, quod rerum suarum incurioso; & negligenti amico, res suas custodiendas commiserit, ac non prius in ipsius mores inquisuerit, quam eius custodiae aliquid tradiderit LVDOV. *doctr. Pand. Tit. Depos. §. 9.* Interim quamvis haec omnia regulariter ita se se habeant, si res simpliciter deponatur, & acceptetur, possunt tamen circumstantiae interuenire, quae depositarium ad maiorem rerum depositarum curam adstringunt, puta si honorarium acceperit, ubi culpa levis praestanda *cap. 2. X. de Depos.* STRYK. *C. C. Sect. 2. cap. 3. §. 8.* aut si se obtulerit deposito, ubi culpam leuissimam praestare tenetur *L. 1. §. 35. ff. Depos.* quod tamen temperat BRVNN. *ad d. L. 1. n. 23.* nisi hoc ex sola commiseratione factum.

§. VI.

Quae haecenus à nobis adducta, minime gentium vero ad depositum irregulare sunt applicanda,

hoc enim à regula generali deuiat, vnde & anomalum & improprium dicitur. *vid. præced. §. 4.* & in hoc à depositario, propter dominium in eum translatum, casum fortuitum esse præstandum, expediti iuris est. Non quidem nos latet, esse quosdam, negantes, hanc conuentionem de vtenda re deposita, depositum manere, sed potius in mutuum abire; ast hanc controuersiam hic nostram facere, plane non opus remur. *conf. interim MEV. conf. 103. n. 78. & STRV. in S. I. C. Excerpt. 21. tb. 76.* Nec multis indagare nobis animus est, à quo tempore depositarius, in hoc deposito irregulari, periculum sustinere debeat? quam quaestionem alias multis DD. decidunt distinctionibus, nempe: vtrum deponens vsum expresse, an tacite, vtrum ab initio, an ex post facto, vtrum sponte an rogatus vtrum cum pacto, vt maneret depositum, an sine eo concesserit? quibus tamen distinctionibus, rem magis implicari, quam explicari, asserit. LEYSER in *Meditat. ad Pand. Specim. 176. §. 4.* addens: *At nos triciis istis opus esse haud putamus, sed indistincte depositarium ex eo demum tempore, quo uti incipit pecunia, ex mutuo obligari & periculum sustinere credimus.* Et hanc opinionem praeludicio quoque FCratis Wittenberg. confirmauit.

§. VII.

Statutum autem Hamburg. de deposito irregulari haud loqui, vel nobis tacentibus, ex ipsa inspectione elucet; nec de illo casu, vbi quis per pactum casum fortuitum in se suscepit; sed de deposito duntaxat regulari, quando deponens simpliciter, & absque speciali pacto, rem suam alterius curae & custodiae

diae commisit, & depositarius quoque eodem modo illam acceptavit. Hinc & regulariter dolum & latam culpam praestandam haberet, nisi per factam alienationem, postea casum fortuitum ex tenore d. *Art. IV.* quoque ferre teneretur. Ratio igitur statuti ante omnia inuestiganda, quia tunc in casibus, quos in seqq. §§. tradituri sumus, facilis erit decisio. Imo iuris scientiae operam navantem adstrictum esse, rationem cuiusdam legis indagare, & non cortici verborum inhaerere, ipsa *L. 17. ff. de LL.* innuit, ubi: *scire leges non est, verba earum tenere, sed vim ac potestatem.* Ratio vero huius statuti non è longinquo est petenda, cum in his verbis contineatur: *Weil er einmahl seiner Treu und Pflicht nicht genug gethan.* Aut uti verba in *L. 1. §. 25. ff. Depos.* sonant: *quia semel dolo fecisti cum venderes.* Et sic violata fides, & dimissio è custodia vnicum fundamentum huius poenalis statuti constituunt. Poenale autem recte dici posse, nemo inficias ibit, dummodo attendat factum depositarii, & quid in hoc statutum. In illo autem quid reperiri, quod legibus naturalibus & civilibus contrariatur, probatione & explicatione non indiget, cum noto notus sit, fidem fallere inter delicta referri, & graue quoddam appellari *L. 1. pr. ff. de pecun. const.* ubi vero adest factum contra leges, ibi quoque delictum. Et ob id quoque praestatio casus fortuiti pro mera poena est habenda, dum nisi factum illicitum praecessisset, etiam in hoc contractu casus fortuitus non fuisset ferendus.

§. VIII.

Sed adhuc vltcrius rimandum; an haec viola-

tio fidei datae, tali poena digna habenda, & annon illa delicto grauior sit dicenda, inprimis quia deponens ex facta alienatione nullum sensit damnum, dum depositarius rem alienatam iterum in causam depositi redemit, quae postea per casum fortuitum interiit? & hic primum ingenue fatemur, non esse ICtorum de legibus, sed secundum leges iudicare quare & haec indago nobis temeritatis affricare posset notam, Ast salua res est. Nam licet secundum leges iudicandum, tamen hoc non tam crude accipiendum, quasi fundamentum ita statuendi, plane non esset inuestigandum, quin potius iudicis est, aequitatem legislatorem mouentem expiscari, & se hac ratione tutum in conscientia reddere. Iustitia ergo huius statuti, in seruanda fide quaerenda, cuius violationem impunitam statuere velle, nihil aliud esset, quam vinculum humanae societatis dissoluere. Nam si quid est, quod ad communem vitae societatem stabiliendam, quod ad commerciorum inter homines vsum introducendum, quod ad populos, amicitiae foederibus inter se iungendos, praestet, hoc profecto facit fides, *sanctissimum* vt loquitur SENECA *Epist. 98. humani pectoris bonum*. Et CICERO *Lib. 1. de Offic.* scribit: *Fundamentum iustitiae est fides, id est dictorum conuentorumque constantia & veritas*. Hinc Germanos in fide seruanda adeo fuisse tenaces, vt in aleae quoque lusu victi, perdita libertate, seruitutis iacturam pati, quam fidem frangere maluerint, vti patet ex TACITO *de Morib. Germ. cap. 24.* vbi: *Victus voluntariam seruitutem adit: quamuis iunior, quamuis robustior, alligari se ac venire patitur.*

Ea

Ea est in re prava perniciousa : ipsi fidem vocant. Imo nihil tam congruum humanae fidei , quam ea quae inter eos placuerunt seruare , asserit VLPIANVS in L. 1. pr. ff. de pact.

§. IX.

Quae cum ita sint, & tam ingens in societatem humanam redundet commodum ; imo fidem esse praecipuum maximumque, per quod stabilia aeternaque redduntur imperia , fundamentum constet, nemo fane, opinamur, tam obstipae mentis erit, qui hanc poenam in depositarium, propter violatam fidem statutam, pro iniusta aut nimis rigorosa haberet. Summis igitur Patriae patres laudibus extolendi sunt, qui hoc statutum olim sanciuerunt, aut qui hodierna tempestate illud in viridi conseruant obseruantia, & hoc modo florem Reipublicae Hamburgensis, in aeterna secula, infatigabili propellere al- laborant cura, bene gnari, magna & florentissima emporia diu subsistere haud posse, sed ad interitum inclinare, nisi leges perfidiam coercentes in illis de- prehendantur, cum fides sit anima mercaturae. At vero haec poena in depositarium, datam fidem fran- gentem, alibi locorum quoque vigeat ? propter, L. 1. §. 25. ff. *Depos.* in dubium quidem vocare audeat GROEN- WEG. de LL. abrog. ad d. L. 1. ob hanc rationem : quia hodie depositarius, re deposita vtens, non acti- one furti tenetur. Verum enim vero hanc ratio- nem in nostro imperio non procedere, liquet ex CONST. CRIM. Art. 170. Et licet istiusmodi per- fidis hodie poena ordinaria furti non infligatur ; in- terim

terim alia poena extraordinaria afficiendos esse, & posse, nemo ambiget. vid. celeberr. KRESS. *Comment. ad d. art. 170.* Quare etiam vsus d. §. 25. contra GROENWEG. defendunt BRVNN. *ad d. L. n. 18.* LAVTERB. *Colleg. pract. Tit. Depos. §. 32.* FRANTZK. *ad ff. eod. n. 72.* MEV, *ad Jus Lubec. Part. III. Tit. 3. Art. 2. n. 15.*

§. X.

Poenae iustitia euieta, nunc pressius ad rem ipsam accedendum, & videndum, in quibus casibus ea sit applicanda. Et hic primo se offert venditio, quando nempe depositarius rem depositam vendidit & eam in causam depositi redemit, quae postea tamen sine dolo malo ipsius periit, quod tunc nihilominus aestimationem rei depositae refundere teneatur, quia semel dolo fecit, cum venderet. Hunc autem casum huc trahendum esse per se patet, dum expressis verbis in ipso statuto continetur. Ast quæstio quaedam hic emergere videtur: an scil. depositarius casum fortuitum ferre debeat, si tantum contractum emtionis venditionis cum aliquo celebravit, rem autem apud se depositam, ementi nondum tradiderit? & fatendum habemus omnino, quod contractus emtionis venditionis inter consensuales referatur, qui ad sui perfectionem traditionem rei venditae haud desiderant, sed iam perfecti dicuntur, simulac contrahentes super re vendenda, & pretio soluendo, consensum dederint *pr. J. de Em. vend. L. 1. §. fin. & L. 9. pr. ff. de contrab. emt.* Quare etiam primo intuitu videri posset, hocce statutum esse applicandum

candum in depositario, qui talem contractum iniit, licet res suae custodiae commissa, alteri nondum tradita esset, inprimis cum fundamentum huius statuti, quod vti §. 7. praeced. affirmauimus, in violata fide consistit, iam adsit, & depositarius fidem datam per huncce contractum iam fregerit. Verum non obstantibus his adductis, tamen ea sumus in opinione, depositarium nondum teneri de casu fortuito, nec statutum applicationem in illo inuenire, nisi traditio rei depositae iam sit facta, moti hac ratione, quod depositarius quidem inceperit fidem datam violare, sed non ad ultimam lineam peruenerit, re deposita adhuc in sua custodia existente, quod haud obscure ex ipso statuto probari potest, dum in illo haec verba reperiuntur: und solches darnach wieder gelöstet. Redemptio autem hic non aliter accipienda, quam si ego rem alteri iam traditam, iterum in meam custodiam redigo; ergo vbi traditio nondum facta, ibi quis rem redemisse dici non potest, & sic solus contractus emtionis venditionis, quamuis etiam in iure iam perfectus dicatur, depositarium non subiicit casui fortuito ferendo, sed insuper requiritur, vt per traditionem rei fuerit consumatus, maxime cum poenalia strictissimae sint interpretationis. Quare etiam expresse in hac actione, quando depositarius de casu fortuito tenetur, traditionem requirit TIRAQ. in Tract. de Jure Const. Poss. P. I. n. pen. & in Tract. de Retract. consang. §. I. Glos. 2. n. 48.

§. XI.

Casu enim in ipso statuto comprehenso explicato,

F

cato,

cato, haud immerito ad alios progredimur, considerando: num & in illis hoc statutum sit admittendum? Et quia contractui emtionis venditionis, maxime affinis est contractus pignoratitius, ergo hic primum nos occupatos tenebit. Quaeritur itaque: an etiam depositarius, si rem depositam alteri oppignorauerit, & tanquam pignus manuale tradiderit, postea autem iterum in causam depositi redemerit, de casu fortuito teneatur? ob stare quidem videtur affirmativae responsioni, regula in praeced. §. data, quod poenalia sint strictissimae interpretationis, & nullam extensionem admittant; deinde quod magna intercedat differentia, inter contractum emtionis venditionis ac pignoratitium, dum in illo, emtore in bona fide existente, a non domino conditio usu capiendi transfertur *L. 25. §. 1. ff. de Contrah. Emr. & L. 30. §. 1. de act. Emr. Vend.* & ita maius deponenti imminet periculum, quam in hoc, ubi nulla praescriptio locum habet, per consequens, depositarius non eodem modo contra fidem datam egisse videtur. Sed nihilominus affirmativam veriore putamus, non tam ob eam rationem, quia per oppignorationem pervenitur ad alienationem *L. ult. C. de reb. alien. non alien.* vnde DD. hanc colligunt regulam: quicquid prohibitum in termino, illud etiam prohibitum in via ad terminum; quam potius, quod fundamentum huius statuti optime in hunc contractum quadret, & fides eodem modo in hoc, ac priori sit violata, dum rem depositam illicite in alterius, suae utilitatis causa, custodiam transtulit; nec attendendum, an deponenti ex illo contractu plus damni imminuerit, nec ne, quia exinde ratio decidendi haud desu-

desumenda, vt taceamus privilegium, quod pignus manuale secundum IVS HAMB. P. II. Tit. IV. art. 2. habet. Quod autem ad regulam attinet: poenalia esse strictissimae interpretationis, hoc cum granu salis accipiendum, nam si ratio legis ipsamet lege expressa, extensio etiam fit in exorbitantibus, correctoriis, poenalibus, & odiosis, quia eiusmodi interpretatio non tam extensiva, quam comprehensiva, vel enunciatiua dicenda est FRANTZK. ad ff. de LL. n. 41. BRVNN. ad Reg. iur. Can. can. 15. n. 13.

§. XII.

Occasione huius materiae minime quoque praetereundum esse censemus, quid statuendum: si depositarius rem depositam non tanquam manuale pignus alteri tradidit, interim tamen hypothecae nexu obligavit, an tunc casum fortuitum praestandum habeat? Sed hic nobis negatiua probabilior videtur, propter iam adductam in §. 10. rationem, quia hoc modo res deposita, è custodia depositarii, ad alium nondum translata, quod tamen in statuto requiritur; deinde quoque desiderandum, ius deponentis, per hypothecam constitutam, haud esse difficilius redditum, dum depositarius in hoc contractu, tamen semper retinuit naturalem potestatem, rem depositam quandocunque libuerit, deponenti restituendi. Nec potest huic obflare ius reale, quod per hypothecam constitutam creditor consequi intendit; nam quod quis non habet, alteri dare non potest, depositario vero nuda custodia rei depositae erat commissa, manente dominio apud deponentem. Nec conquerendum habet creditor

ditor, se deceptum esse, quia sibi imputare debet, quod non diligentius inquisiuerit, vtrum etiam res ad illud pertineret, qui eam hypothecae nexu obligauerat. Dolose itaque quidem depositarius egit, & quoque fidem deponenti datam violauit, sed tamen non ita, vt hocce statutum poenale sit applicandum, quare si depositarius rem depositam ab hoc vinculo iterum liberauit, quae postea casu periiit, eum ad hunc praestandum adigi posse, haud opinamur, quia violatio fidei, & dimissio est custodia, coniunctim requiruntur.

§. XIII.

Porro deducimur ad commodatum, si depositarius vsum rei depositae, alteri gratis ad certum tempus concessisset, & sic nullum lucrum, vel commodum ex re deposita sibi quaerere voluisset, vti in praecedentibus contractibus adductis erit factum. Et hic depositarium ab interitu fatali liberandum esse, non leues videntur suadere causae, parum, quod perfidia maior sit aestimanda, quae originem ex illicito, suae promouendae vtilitatis fundamento traxit, quam quae ad subleuandam alterius egestatem, misericordia ac compassione fortean ductus, commissa: partim, quod in commodato nec dominium, nec possessio rei commodatae, in commendatarium transferatur. *L. 8. § 9. ff. Commod.* Sed haec commodans retinet: partim, quod commodatarius exactissimam diligentiam, in re commodata adhibere debeat, & sic haud verendum, rem depositam, in commodatum concessam, deteriore fieri. Verum enim vero! licet hae
causae

causae sat speciosae appareant, attamen non sufficientes sunt, ad immunem praestandum depositarium à casu fortuito, qui postea in re deposita contigit, quoniam statutum nullum respectum habuit, an fides data fracta sit propter commodum, quod quis exinde sperauit, vel propter misericordiam & compassionem, quae depositarium mouit, ad fidem frangendam, vel denique an res deposita sit facta deterior, nec ne? Sed tantum; vtrum depositarius inscio deponente, rem depositam alienauerit, aut è sua custodia dimiserit? Et hoc hic quoque factum, plane nullum dubium habet; ergo vbi statutum non distinguit, nec nostrum erit distinguere. Quibus adhuc tanquam primaria causa accedit, quod propter securitatem commerciorum, secundum *IVS LVB. Part. III. Tit. 2. art. 2.* & *IVS HAMB. Part. II. Tit. 2. art. 7.* commodanti ne quidem permittatur, rem commodatam à quocunque possessore vindicare, sed tantummodo commodatarium conuenire, quare aestimatione, seu quanti interest, contentus esse cogitur *MEV. ad d. l. n. 24.* vt hac ratione deponens, si res ipsius à depositario commodato data, magnum periculum rei amittendae incurrat, & depositarius fere eodem modo, ac in superioribus contractibus fidem violauerit,

§. XIV.

Tandem & casus necessitatis ponderandus, quando nempe depositarius propter summam necessitatem re deposita usus est, quod alias furtum usus vocari solet. Verum hic distincte procedendum, & videndum, qualis adfuerit necessitas? an gravis

& magna, an extrema & grauissima, vti à moralistis distingui solet; Deinde an necessitas fuerit publica, an priuata? In priori distinctione, quando adest necessitas grauissima, tunc conceditur vsus rei depositae non tantum, sed & insuper furta excusantur, secundum GROTIUM *de I. B. & P. Lib. 2. cap. 2. §. 6.* ob rationem: quia tunc ius illud pristinum rebus vtendi, tanquam si communes mansissent, reuiuiscit, quod tamen improbat ZIEGLER *ad d. §. 6.* scribendo: *non abesse potest dolus, vbi quis inuito domino, nec praecio magistratus decreto, rem alicuius contrectat, quem sane necessitatis praetextus purgare nequit, cum nulla tanta viro bono vis inferri posset, vt sciens turpitudine aliqua se contaminet.* In posteriori distinctione, si necessitas publica alienationem urgeat, non dubitandum, quin illa sit permessa, dum quisque ad securitatem publicam promouendam obligatur. Hinc LEYSER *in Medis. ad Pand. Specim. 176. med. 10.* scribit: *Non itaque peccarunt Sigismundi Poloniarum regis legati, qui vt exercitui ob non soluta stipendia seditionem, & quae tunc erat verum facies, toti regno perniciem minitanti satisfacere, deposito ducis Zaslauensis in praetorio leopoliensi manum iniecerunt, atque sic tumultum felicissime sopierunt.* Si nunc applicatio facienda, primum dispiciendum est: quando quis dicatur in grauissima necessitate constitutus? Et hic plerumque respondetur: cum quis aliter vitam suam conseruare non potuit, quorum vulgo referunt, necessitatem famis, & propter c. 3. *X. de furt.* nuditatem corporis, vbi contra saeuitiam frigoris quis se munire non valet. Et hanc necessitatem citra culpam, quod tamen requiritur, dari, vix asse-

asserendum, nisi casum excipias, quem habet PVF-FEND. *de l. N & G. Lib. 2. cap. 6. §. 5.* nempe: si quis naufragio eiectus, in aliena regione inops, ignotus, amicisque carens degat, & legitimo modo vitae suae conseruandae consulere nequeat. Sed hoc casu depositarius, si forte rem depositam secum haberet, illa vti, & ad conseruationem vitae alienare posse, nemo dubitabit, & inutiliter de casu fortuito tunc quaestio mouetur. Quare alium casum aliquo modo huc trahendum, subministrabimus, v. g. si depositarius die certo, certam summam pecuniae ex cambio exsoluendam haberet, & ille parata pecunia, & mercibus destitueretur, ne itaque de mensa surgere, & foro cedere cogeretur, rem depositam oppignoraui aut vendidit, & pecunia inde redacta, cambium liberauit. Nam hoc casu depositarium in necessitate fuisse constitutum, dum fama & vita pari passu ambulant, nemo temere inficiabitur. Si itaque depositarius ad pinguiorem fortunam redeat, & rem depositam alienatam in causam depositi redimat, quae postea casu perit, nihilominus hunc ferre tenetur, quia haec necessitas violatam fidem non excusat, dum potuisset illam deponenti exponere, & ipsius consensum impetrare. Quid autem in publica necessitate statuendum? ex supra adductis iam liquet.

§. XV.

Casus hic recensere plures ad explicandum, & illustrandum dictum statutum, merito superfedemus, cum ex illis sat luculenter, opinamur, constabit, quanam sit ratio decidendi, quam quisque quoque
in

in aliis casibus obuenientibus, nisi circumstantiae aliud suadeant, sequendam habet. Transimus ergo ad exceptiones quasdam, quibus vti solent, se à praestatione casus fortuiti liberantes, indagaturi: an etiam depositarius, qui contra hocce statutum egit, eas ad sui defensionem allegare, ac hac ratione restitutionem rei depositae, casu peremtae, declinare possit?

§. XVI.

Et hic primo se offert decantatissima illa distinctio, inter casum solitum, insolitum &, insolitissimum, vbi DD in diuersas partes rapiuntur, dum aliqui statuunt, eum, qui casum fortuitum in se recepit, solum teneri de casu solito, non vero insolito, ob hanc rationem: quia generalis, ad praestandos casus fortuitos obligatio, cum singulos infortuniorum species haud complectatur, pro inani agnoscenda est, ne ultra intentionem suam obstringatur paciscens. Alii autem hoc negant, asserendo: eum, qui generaliter omnium casuum periculum in se suscepit, etiam de insolito teneri, cum semper specialia generalibus insint *L. 147. ff. de R. l. & proprio verborum sensui inhaerendum sit, qui nunquam deferendus, nisi manifestum, partes aliud voluisse L. 69. pr. ff. de Legat. 3. maxime quod huic, qui omnium casuum praestationem sibi promitti curauit, nihil imputandum, dum ex iusta ratione, sub fortuitis etiam insolitos casus contineri putauit. Alii tandem sub casu solito etiam insolitum comprehendi affirmantes, tamen excipiunt insolitissimum, vix mille annis semel contingentem, quippe*

pe cum de illis etiam prudentem virum non cogitasse, ob raritatem eorum, probabile sit *L. 6. ff de Pignor. L. 15. §. 26 f. de iniur.* Verum hanc controverfiam hic recoquere nolumus, instituti nostri ratione hoc non desiderante; euoluat ergo huius rei cupidus MENKEN. *in alleg. sup. Dissert. de Conuent. circa praestand. cas. fort. §. 35. 36. & 37. add. BARTHIVS de Dissens. in prax. Cent. 7. Diff. 630.* qui sat amplum catalogum magni nominis ICTORUM contexuit, à quibus haec quaestio pro & contra est ventilata. Hoc tamen ostendere nostrum est omnino; an etiam depositarius, qui propter alienationem rei depositae factam, vi huius statuti, de casu fortuito tenetur, ad hanc distinctionem prouocare, & ex illa liberationem petere possit? Et hoc absolute negandum. Nam quando de hac distinctione serra contentionis recipiatur, tunc semper praesupponendum, pactum de casu fortuito recipiendo praecessisse, quod tamen hic non factum, sed depositarius absque conuentione, vigore statuti obligatur, & quidem propter violatam fidem. Ergo si postea res deposita perierit, siue per casum solitum, siue insolitum, siue insolitissimum, semper hunc ferre debet, eodem modo ac iure ciuili, si culpa casum praecesserit, ubi etiam nulla ratio huius distinctionis habetur.

§. XVII.

Altera exceptio est, qua illi se defendere solent, quibus praestatio casus fortuiti incumbit, quod res eodem modo apud dominum peritura fuisset. Et sane haud diffitendum, hanc maximam aequitatem

G

prae

prae se ferre, quare etiam haeres in mora constitutus, qui alias interitum rei legatae, legatario praestare tenetur, absoluitur, si docere possit, rem legatam apud ipsum legatarium quoque fuisse perituram. HOPP. *Comment. ad §. 16. l. de Legat. verb. legatario decessit.* Sic commodatarius in re commodata restituenda moras nectens, autem ad alienum usum, quam ad quem erat data, applicans, quidem de casu fortuito tenetur; interim tamen hac exceptione se ab illo liberare potest WERNHER *observat. Select. Forens. Part. 4. Obs. 214. n. 14.* Quid ergo in nostro casu obtineat? nunc videndum. Et hic primo loco fundamenti ponimus *L. 14. §. 1. ff. Depos.* ubi depositarius etiam post moram, immunis pronuntiatur à casu, si res, licet restituta fuisset, eodem modo periisset apud deponentem. Vid. BRVNN. *ad d. l.* Si itaque depositarius post moram, quae alias periculum in morosum transfert, hac exceptione audiendus, ergo exinde concludimus, etiam eum audiendum esse, qui propter alienationem rei depositae factam, casum fortuitum praestandum haberet. Nam ubi eadem ratio, ibi quoque eadem iuris dispositio. Nec est quod excipias, depositarium magis delinquere, qui rem depositam alienat, & sic fidem datam violat, quam qui in mora, rei depositae restituendae, se deprehendi patitur, quoniam in utroque casu est transgressio legis, & sicuti alienatio est prohibita, sic quoque mora. Quare etiam aequalis poena statuta, & quid in uno iustum, in altero iniustum dici nequit.

§. XVIII.

Deinde deponens hoc casu nequidem exceptionem,

nem, se voluisse, & potuisse, rem ante casum existentem, distrahere, quam tamen poterat opponere, si depositarius in mora deprehenderetur, vrgere potest, ex hac ratione: quia rem depositam, à depositario nondum petiit, quod tamen omnino facturus fuisset, si commodam distrahendi occasionem habuisset. Quapropter & ipsa aequitas naturalis depositarium absolvere videtur, ad quod demonstrandum, sequentem dabimus casum, v. gr. depositarius rem alienatam in causam depositi redemit, antequam autem restitutio à deponente vrgeatur, incendium in aedibus depositarii, absque sua culpa exoritur, & per hoc etiam simui aedes deponentis in cineres rediguntur, si nunc deponens rescisceret, rem suam depositam, à depositario fuisse alienatam, & ex hoc capite restitutionem desideraret, an putes, hoc salva aequitate naturali fieri posse? quod omnino negandum, dum res, quamvis restituta, eodem modo apud deponentem periisset, & sic ex antecedanea restitutione, nullum commodum capere, vel rem conseruare potuisset, quod tamen secus se habet, si res apud deponentem in saluo fuisset, nam tunc facta alienatio merito attendenda, & ob eam restitutio iniungenda.

§. XIX,

Ostensum haftenus, quando depositarius de casu fortuito ex dicto statuto teneatur; ergo & nunc porro inquirendum, ad quidnam obligetur? Et hic, si verba statuti inspiciamus, à depositario tantum simplex restitutio, rei depositae peremtae, exigitur:

So soll er nicht destoweniger dasselbe zu bezahlen schul-

dig seyn. Verum sicuti vna lex, ex altera saepissime explicationem recipit; ita & hoc statutum, ex alio statuto, quod continetur *ars. 8. d. t.* interpretationem foeneratur, vbi dicitur primum de quantitate deposita, quod depositarius post moram vsuras praestare obligetur, & deinde haec subiiciuntur verba: *Wie in gleichen auch, so er solch deponirt Guth ohn Vorwissen des Deponenten oder Eigenthümers, zu eigenen Vortheil gebrauchen würde.* Ex quibus itaque satis evidens est, depositarium non ad restitutionem tantum rei depositae teneri, sed & insuper ad vsuras soluendas, condemnari posse. Videtur quidem hoc naturae huius contractus contrariari, vtpote gratuiti, adeoque prorsus incongruum esse, in hoc contractu admittere vsuras, inprimis in deposito regulari, nam in irregulari hoc expediti iuris est; interim nihil verat, quo minus hoc fieri possit, sicuti enim mutuum etiam dicitur gratuitum, & tamen pro vsu mae pecuniae vsura recte promittitur, sic & in deposito vel lege, vel alia singulari ratione, ad soluendas vsuras aliquis adstringi potest. Nec illa distinctio: an quantitas, an vero species sit deposita? hic attendenda. Nam licet ambabus largiamur, vsuram semper fortem praesupponere, cuius dominium & vsus transfertur, qualis in deposito certae speciei subesse nequit, quamdiu illa consistit, & reddi potest FRANTZK. *ad ff. tit. Depos. n. 68.* attamen si consideres proprietatem vocabuli vsurae, illud tam ad corporum quam ad quantitatum accessiones referri potest, vid. NOODT. *de foener. § Vsur. Lib. 1. c. 1.* quanquam ex vsu loquendi, tunc vulgo interesse vocetur. Hinc

GOR-

GORDIANVS IMPERATOR in L. 3. § 4. C. *Depos.* rescribit: *Si depositi experiaris, non immerito etiam usuras tibi restitus flagitabis; cum tibi debeat gratulari, quod furti eum actione non facias obnoxium, siquidem qui rem depositam inuito domino, sciens prudensque in usus suos conuerterit, etiam furti delicto succedit.*

§. XX.

Verum hic noua emergit quaestio: quomodo aestimatio rei peremptae, aut interesse sit probandum? nam haud raro circa hoc probandum lites oriri, instrepitu forense versantibus, noto notius est, dum ille, qui aestimationem praestare debet, hanc minuere; contra qui eam petit, hanc augere intendit. Omnes autem modos probandi hic percurrere, nimis longum esset; ergo hunc modum duntaxat enucleare volumus; qui fit per iuramentum in litem, inquisituri: an contra depositarium deponens, ad hoc iuramentum sit admittendus. Antequam autem huic quaestioni decisionem subiungamus, leui quasi brachio, natura huius iuramenti tangenda. Diuiditur alias in iuramentum affectionis & veritatis; ad illud requiritur vt res dolo malo, vel lata culpa nobis sit intercepta; deinde vt talis res sit, in quam singularis affectio cadere possit, vnde in pecunia aliisque rebus fungibilibus regulariter huic iuramento locus non est vid. **THOMAS**, in *Diss. de pretio affect. in res fungib. non cadente* cap. 2. §. 20. Ad hoc vero illis circumstantiis plane non opus, quippe cui semper locus, licet non adsit species affectionem recipiens, aut licet nec dolus, nec culpa alteri imputa-

ri possit, cum lis, quanti re vera est, secundum communem valorem aestimetur. His praemissis, decisio per se fluit, scil. deponentem ad vtrumque esse admittendum *L. 1. §. 26. ff. Depos.* ad illud, quia propter dolum commissum, restitutione rei peremptae operatur, seruata tamen distinctione, rem affectionem recipientem esse depositam: ad hoc autem indistincte, quod prorsus nil dubii fouet. Nec obstat, interdum in bonae fidei iudiciis, olim hoc iuramentum affectionis in litem, locum non inuenisse, ob subtilem iuris rationem, quod in his civilis actor, non sit dominus rei, nec lus in re habeat, SCHILTER. *Exercit. ad Pand. §. 54.* cum in praxi latius hoc iuramentum pateat, adeo vt etiam in stricti iuris iudiciis, & non arbitrariis deferatur. STRYK. *V. M. Tit. de in litem iur. §. 6.* CARPZ. *P. 1. Consl. 23. Def. 19. n. 7* STRVV. *Iurispr. R. G. Lib. 4. Tit. 12. §. 17.* add. omnino LVDOV. *Vfus pract. Dist. iurid. Tit. de in lit. iur. Distinct. 1.* Hoc tamen non negligendum, iudicem & posse, & debere, aliquando certam summam praefinire, vsque ad quam iuretur, ne actor iniquior sit iudex in re sua. Imo & si iuratum fuerit, non praefinita summa, licebit nihilominus iudici minoris condemnare, adeoque adhuc summam moderari, *L. §. 1. §. 2. ff. de in lit. iurand.* SCHILTER. *c. 1. §. 51.*

§. XXI.

Quando ergo depositarius, nullum amplius refugium habet se liberandi à restitutione, sed vigore statuti condemnandus, ad soluendam rei depositae casu peremptae aestimationem, etiam non incongrue, nec inu-

inutiliter quaeritur: numne exceptionem compensationis opponere possit, & hac ratione sententiae in se latae satisfacere? Verum si hic multitudini DD. palma esset attribuenda, ilico in negativam rueremur. Interim quoniam alicui laudi haud ducitur, coeco aliorum vestigia premere impetu, sed ponderandas esse pro tenuitate virium rationes, quibus ad stabilendam negativam utuntur; hinc quid nobis sedeat opinionis? saluo aliorum rectius sententium iudicio, modeste dicere, neminem in malam partem interpretaturum persuasi sumus, quam qui persuasissimi.

§. XXII.

Rationes negativam defendentium autem haec sunt: quod §. 30. *l. de Act.* haec verba reperiantur: *excepta sola depositi actione, cui aliquid compensationis nomine opponi, sane iniquum esse credimus: ne sub praetextu compensationis depositarum rerum quis exactiōe defraudetur.* Et quod idem quoque repetatur in *L. ult. §. 1. C. de Compens. & L. penult. C. Depos.* Vnde inferunt: quoniam Imperator generaliter loquitur, & in deposito consumto, ubi de pretio agitur, exceptionem compensationis cessare debere: Deinde vrgent exuberantiorē fidem & fiduciam, quam deponens in depositario collocatam habuit, ergo ne contractus, qui ex bona fide oritur, ad perfidiam retrahatur, compensationem haud esse admittendam: Et tandem se fundant in eo, quod depositarius regulariter tantum dolum & latam culpam in hoc contractu praestare tenetur, si itaque compensationem opponere posset, sequeretur, ut depositarius ex suo dolo, & huic simili
lata

lata culpa. ius compensandi. sibi quaesivisset, quod tamen omnino iniquum dicendum. Ob has igitur rationes exceptionem compensationis, etiam ubi de aestimatione rei depositae lis mora, rei ieiunct, BRVNN. *ad L. ult. C. de Compens. n. 10.* LAVTERB. *Colleg. pract. Tit. de Compens. §. 20.* ZANGER *de Except. Part. 3. cap. 8. n. 118.* BERGER. *Oecon. lur. Lib. 3. Tit. 15. Thes. 4. not. 5. & multi alii.* Imo HAHN *ad WESENB. Tit. Depos. n. 5.* ne quidem ius retentionis ob impensas admittit, quod plurimi tamen defendunt, sub distinctione inter debitum peregrinum & domesticum, id est ex causa depositi contractum, ita ut in hoc, tam compensationem, quam retentionem licitam esse, affirmant, id quod & in praxi receptum esse testatur, STRYK *V. M. Tit. Depos. §. 9.*

§. XXIII.

Quandoquidem nunc nostra subiicienda est sententia, in qua etiam non plane quorundam auctoritate destituti sumus; sic exceptionem compensationis deponenti a depositario recte opponi putamus, si ille ad aestimationem rei depositae peremptae restituendam, sit condemnatus. Equidem non ex hoc fundamento, ex quo compensationis originem derivat GROTIUS. *De I. B. & P. Lib. 3. cap. 19. §. 15.* dum scribit: *Nos, si quid nostrum est, aut quod nobis debetur, consequi aliter non possumus, ab eo qui nostrum habet aut nobis debet tantundem in re quavis accipere posse.* Unde sequitur, *ut multo magis possimus id quod penes nos est, siue corporale, siue incorporale retinere.* Quoniam eum in finem ubicunque locorum magistratus est constitutus, quem quisque

que ad suum consequendum, adire debet; sed quia nullam sufficientem rationem, ob quam depositarius à compensatione excludendus, dari posse, nobis videtur. Et hoc clare & sufficienter demonstrari potest, si requisita in compensatione omnino observanda, paulo penitius rimemur, quae autem sunt: quod utrinque debitum adsit, licet ex diversa causa; deinde quod debeatur res fungibilis, in quam non cadit specialis affectio; porro quod debitum ex utraque parte sit liquidum, vel ex confessione, vel ex re iudicata; & postremo quod etiam adsit debitum purum, non conditionarum, nec in iure reprobatur. Si itaque nunc applicatio instituenda, tunc primum facile est intellectu, nos tale debitum in deponente praesupponere, quod in quantitate consistit; nam si debitum speciei esset, compensationem cessare, non tantum in hoc, sed quoque in omnibus aliis contractibus, propter inaequalem aestimationem constat. Ergo requirimus debitum in deponente, cui omnia, quae de compensatione adduximus, applicari possunt, & sic firmiter exinde concludere licet: ubi cuncta requisita in compensatione attendenda, adsunt, ibi utrinque debitum compensari potest; atqui in debito deponentis & depositarii haec requisita adsunt, ergo compensatio quoque admittenda. Maioris consequentia quidem vacillare videtur, dum haec saltem in tantum vera, in quantum leges compensationem non prohibent, uti hic in deposito inveniuntur; at leges solummodo loqui de hoc casu, si quantitas deposita adhuc extet, non autem si aestimatio rei depositae praestanda, *in seq. §.* uberioribus demonstra-

H

turi

turi sumus. Minorem autem sua luce radiare, fortean negauerit nemo, dum nobis non de alio, sed de eiusmodi tantum casu sermo est, vbi haec requisita deprehenduntur. Nec potest vrgeri, depositarii debitum ex delicto oriri; deponentis vero ex legitimo quodam contractu; hoc enim in compensatione non attenditur, ex qua causa vtrinque debitum originem traxerit, sed an sit purum & liquidum?

§. XXIV.

Quod attinet ad rationes, quibus contrarium defendentes innituntur, ad has hunc in modum responderi posse, remur. Prima igitur ratio erat, quod Imperator generaliter locutus esset, & sic non praesumendum, eum tantum hunc casum comprehensum voluisse, si depositum in quantitate consisteret, sed etiam quando res deposita esset, & huius aestimatio peteretur; verum hanc extensionem non esse faciendam, vel exinde liquet, quia hoc modo non possemus non legislatorem arguere, quasi aliquid sine ratione constituisset, cum nihil aliud esset, ac si dixisset: depositarius debet hos centum Ioachimicos, propter rem depositam peremtam deponenti debitos, ei primum soluere, & simulac solutio facta, statim recipere, propter debitum liquidissimum, quo deponens depositario obstrictus est; nam ex quo iure iudex obligatur condemnare depositarium, ad exsoluendum pretium rei depositae peremtae, ex eodem etiam tenetur deponentem adigere, ad praestandum debitum liquidum, in quo dies venit & cessit. Quis autem statueret, legislatorem ita ludere, & his inutilibus ambagibus vti voluisse? Nec regeri potest:

test : ergo exceptio compensationis semper est admittenda, licet etiam quantitas deposita adhuc extet ; nam tunc subesse possunt rationes, ob quas deponens quantitatem in natura restituendam desiderat, quae autem ubi de aestimatione agitur, plane praeferrri non possunt. Et tandem si rationem ipsam inspiciamus, ob quam Imperator compensationem, in actione depositi directâ, exulare voluit, scilicet : ne sub praetextu compensationis, depositarum rerum quis exactiōne defraudetur, sat luculenter innotescit, quod haec in compensatione opposita, ubi de aestimatione agitur, locum non inueniat, cum per illam deponens in exactiōne non defraudetur. Et in hac explicatione nobiscum consentit HVBERS in *Praelect.* : ad l. Tit. de Act. n. 30. in fine, cuius verba hic apposuisse, non ingratum fore credimus : Nimirum quatenus hoc praetextu dominus rerum depositarum exactiōne defraudaretur : Non vult Caesar restitutionem depositi ullam moram accipere obtentu compensationis ; sed ubi tantum de praestatione pecuniaria ex causa depositi agitur, ibi nulla ratio dubitandi reddi potest, quare compensatio esset neganda. Idem ad ff. Tit. de Compens. n. 16. TITIVS. Obseru. ad LAVTERB. 475.

§. XXV.

Ratio secunda & tertia non multum in recessu habent ; illa enim quae in exuberantiore fide consistit, quam depositarius deponenti debeat, per hanc compensationem, cum res deposita iam sit perempta, non amplius alteratur, sed hoc tum factum, cum depositarius propter dolum & culpam, rem depositam non ita custodiuit, ut deponens credebat, quare etiam

hanc violatam fidem cum suo damno luere debet, & pretium rei depositae, licet casu peremtae, praestare tenetur, & per consequens compensatio non contra ipsum depositum, sed contra aestimationem, à depositario praestandam, opponitur, cui accedit, quod fides, quam depositarius in deponente collocatam habuit, eodem modo exuberans dici possit, ac illa, qua depositarius deponenti obstrictus, casus esto: depositarius deponenti, ad suas instantes preces, certam summam pecuniae credidit, sub hac conditione, vt certo die restitueretur, elapso autem die, deponens immemor suae promissionis euadit, & interim quoque propter culpam depositarii res deposita periit: Si nunc deponens ad aestimationem agat, ex qua ratione putes, quaeso, depositarium non posse opponere compensationem? profecto exuberantia fidei hic rem non conficit, vt pote quae tam magna fuit in depositario, pecuniam deponenti credente, quam in deponente, alterius custodiae rem suam committente. Haec scil. tertia ratio, quod depositarius ita ex dolo ius compensandi quaerere posset, vix attendenda nobis videtur, cum hoc non fiat effectiue, sed tantum occasionaliter; & deinde quoque hic dolus cum dolo compensandus, quoniam deponens sibi debitum liquidissimum, animo compensandi oppositum, non admittens, non potest non dolose agere. Ex his igitur rationibus conuicti, etiam eum, qui ex hoc statuto propter alienationem in rei depositae aestimationem condemnatus, exceptionem compensationis obuerrere posse, arbitramur.

§. XXVI.

Denique adhuc vnica quaestio tangenda: an
etiam

etiam haeredes defuncti, ex hoc statuto obligati, teneantur ad resarciendum casum fortuitum? Et hic vt distincte procedamus, casus fortuitus contigit vel depositario viuo, qui tamen statim postea viuis ereptus, vel eo iam defuncto; si prius, prorsus nullum dubium adest, quin haeredes casum praestandum habeant, cum haeres de re deposita apud defunctum teneatur, etiamsi hic dolum commiserit *L. 7. §. 1. ff. Depos. L. ex contractibus 49. ff. de O. & A.* & plerumque ram heridibus nostris, quam nobismet ipsis prospectum eamus *L. 9. ff. de Probat.* Nec obstat: quod heredes alias in delictis non teneantur, nisi pro ea parte, quae ad illos peruenit *L. 26. ff. de dolomat.* quia dolus hic ex contractu venit *BRVN. ad d. l. 7. §. 1. n. 2.* & naturam haud retinet, sed eius contractus induit, cui inest. Secus ergo vbi actio ex ipso maleficio nata, immediate personam delinquentis afficit, nam tunc haeres hac ratione defunctum non repraesentat *L. 22. C. de Poenis.* Sin posterius, & res deposita, post mortem depositarii per casum interiit, heredes a praestatione casus fortuiti immunes sunt censendi. Neque enim ex facto proprio ad praestandum casum obligantur, cum rem depositam haud alienauerint; neque ex facto defuncti, quod haecenus poenae non obnoxium fuit, cum rem saluam reliquerit. Equidem obligatio ex contractu ad rem custodiendam ad haeredes, defuncti personam repraesentantes, transit; sed obligatio ad resarciendum damnum, quae viuo depositario, ob defectum casus fortuiti, seu deficiente legis poenalis conditione, nondum extitit, ad heredes transire non potuit. De cetero omnia ovae

hactenus à nobis circa hoc statutum sunt adducta, & in quibus depositarius casum fortuitum ferre tenetur, praesupponunt ignorantiam deponentis, nam si ad ipsius notitiam peruenit, depositarium rem suam depositam alienasse, & eam iterum in causam depositi redemisse, ac ille nihilominus depositum apud eum reliquit, tunc hoc ei condonasse, recte praesumitur.

§. XXVII.

Et hic terminus esto, quanquam lubentes fateamur, permultas adhuc quaestiones circa hoc statutum locum inuenisse, nempe: an depositarius ex illo ad casum fortuitum ferendum condemnatus, etiam possit detrahere impensas in rem depositam factas? an qui partem duntaxat alienauit, etiam de dota re deposita teneatur? an contra statutum agens fiat infamis? an propterea è tribu eiiciendus? an tanquam testis inhabilis recte reiiciatur &c. &c. Verum ne iusto longiores euadamus, & harum quaestionum decisio ex ventilitatis haud difficilis est coniectu, filum hic abrumpimus; nobis gratulaturi quam maxime, si quae fortean, Lector beneuole! ad gustum tuum scripta fuerint, *nam omnium habere memoriam, & penitus in nullo peccare, diuinitatis magis, quam mortalitatis est, sicuti monet, IMPERATOR in Const. Tanta. de confirmat. Digest. §. 14.* Quare etiam huic nostro, in dictum statutum labori, haud commentarii nomen, imo nequidem commentarioli induere volumus, sed tantum vt specimen commentarioli exhibeat, ne quis arrogantiae, cuius sumus acerrimi ofores, nos incusare possit. Interim si qui sint, in quos Terentianum illud in *Adelph. Act. 1. Scen. 2.* quadrat:

Homine

*Homine imperito nunquam quicquam iniusius,
Qui nisi quod ipse fecit, nihil rectum putat.*

Illos nos flocci pendere, scias. Summo autem Numi-
ni supplices persoluimus grates, quod ad hunc inge-
nii foetum, cuius correctionem limitatori Minerua
instructo, concedimus lubentissime, manus auxiliatri-
ces nobis porrigere voluerit clementissime. Cuius in-
finitae potentiae ardentissimis quoque commendamus
precibus, Illustrem Rempublicam Hamburgensem, &
in illa Patres Patriae, tanquam grandia coeli deposita,
quorum dexteritate, prudentia, atque cura salus ciui-
um indies capit incrementa maiora, imo maxima. Eat
in aevi senescentis memoriam haec omnium rerum
optandarum affluentia, ne ullus vnquam casus for-
tuitus eam concutiat, sed si quis fortean contingat, is
ab omni infortunio alienissimus, genus felicitatis
vsquequaque secum ferat nouum.

T A N T V M.

PRAENOBILISSIMO, ATQUE DOCTISSIMO
DOMINO CANDIDATO,
FAVTORI, ET AMICO SVO CERTISSIMO.

S. P. D.

P R A E S E S.

Est sane indubium, Amicorum aestumatissime ! me magno
hodie delibutum esse gaudio, vbi altera vice Te in Ca-
thedram Respondentium duco, dispari quidem effectu,
non tamen sine laude. Nam prima vice ingenii dunta-
taxat acumen exercebas ; hac vice vero simul promeritos solidae e-
ruditionis fructus consequeris, tuos vsquequaque mansuros, nec
villo casu fortuito, perituros. Quare eleganter PLINIVS *Paneg.*
Cap.

Cap 54. n. 12. scribit: *Titulis omnibus speciosus reor, quando non tribus, aut sexis nomen tuum, sed monumentis aeternae laudis inciditur.* Animus quidem primum erat, tuam disputationem inauguralem programmate quodam comitari, cuius argumentum tanquam affine tuae disputationis, esse debebat. Quisnam in deposito iudiciali casum fortuitum ferendum haberet? At quia hoc in disputationibus inauguralibus non est necessitatis, sed liberi arbitrii; ergo certas ob causas, animum mutavi. Interim ne prorsus villo, mei in Te amoris, publico documento destituatur disputatio tua, breuem hanc epistolam adiicere lubuit, in qua tamen in laudes excurrere tuas, modestia, in os laudari impatiens, prohibet. Hoc autem sine rubore leges, si dicam, Te talem factum, qualem cognitum iudicavi. Nam ex quo illustrem Academiam Lipsiensem, quae Te per annum & quod excurrit, Iurisprudentiae sedulo operam navantem, habuit, deseruisti, & nostram Alman Rosarum ingressus, meo conuictu, ac informatione usus es, insignem in Te observavi morum elegantiam, atque ingenium ad optimas artes facile ac tenax, inprimis vero ardorem haud exiguum, Te tingendi iis scientiis, quae in sacerdote iustitiae oppido desiderantur. Et quid mirum! erectiori enim indole praedito, semper obuersatur illud PETRONII *pag. m. 270. Literae thesaurum est, & artificium nunquam moritur.* Maeste itaque, Amice coniunctissime! tuo ingenio, ad eximia quacuis contendenti, atque BLOCKII nominis decus in Te oblescere non permitte. Et quia iuris patrii particulam illustrare tibi elegisti, bene gnarus, quod turpe sit Patricio & Nobili & causas oranti, ius ignorare istius loci, in quo versatur, ut IVRISCONSULTVS ait *L. 2. §. 43. ff. de O. I.* Hinc, si sint, qui de hoc specimine gaudent, me ob illud exultim laetari, credas, velim. DEUS T. O. M. autem, qui providentiae suae tabulis Mortalium fata habet inscripta, Tibi concedat felicissima, ut ad patrios lares reuersus, mox laboris tui messem experiaris vberissimam. Vale! & TVOS, inprimis aurem Virum Praenobilissimum atque Consultissimum, Dominum Doctorem PAVLI, Senatorem Reipublicae Hamburgensis meritisimum, Affinem meum longe aestimatisimum, plurima ex me salute imperti, Vale!

Scribebam Rostochii, d. XX. Octobris

MDCCXXXVI.

§§ : (§) : (§ §



1772-1800